

# Powšitkowne WOZJEWJENJA

njedźelu, 22. awgusta 2010

## Hra „Via Regia woła“ předstaji so w Chróścicach

Towarstwo Cyrila a Metoda z.t. a Chróścanska wosada přeprašujetej na předstajenje noweje dźiwadloweje hry „Via Regia woła“. Wona je wěnowana k 1.000. posmjertnym narodninam biskopa Bena, japoštoła Serbow. 180 lajskich wumělcow – dźiwadźelnikow, spěwarjow, hudźbnikow a rejowarjow předstaji hru na scěhowacymaj terminomaj:

**njedźelu, 22. awgusta, w 16.30 hodź.** – wosebje za wěriwych Budyskeje wosady, za wobdźělnikow swójbneho popołdnja w Smochćicach kaž tež za ewangelskich wěriwych

**njedźelu, 22. awgusta, w 20 hodź.** – wosebje za Radworskich a Kulowskich wosadnych

Wšitke předstajenje su w serbskej rěči na farskej łuce w Chróścicach. Němskim přihladowarjam poskići so simultany přeložk ze sluchatkami. Zastup plaći sydom eurow za dorosćenych, štyri eura za młodostnych a dwaj euraj za dźěći.

## Bus do Oberammergauwa

Wšitcy, kotřiž su so za jězbu do Oberammergauwa přizjewili, njech su štwórtk, 26. awgusta, rano w 6 hodź. na dworje Chróścanskeje fary. Wottam bus wotjědže.

## Młodźinske kemše w Chróścicach

Pater Paulus Maria Tautz wuhotuje ze swojimi sobubratrami a skupinu młodostnych Božu mšu k zahajenjeju přihota na přiwzaće młodžiny pjatk, 27. awgusta, w 19 hodź. w Chróścicach. Nadrobnije informacije k tomu wozjewja Katolski Posoł tutu njedźelu.

## Šolowy dzeń we Worklecach

Sobotu, 28. awgusta su wšitke wosadne šole a dźěći, kotrež rady spěwaja, wot 9 do 14 hodź. na šolowy dzeń do Don Boskoweho domu we Worklecach přeprašene. Zajimcy njech so prošu hač do wutory, 24. awgusta, pod telefonowym čislom (03 57 96) 8 87 07 we Worklecach přizjewja. Za wudawki dnja zběra so wot kóždeho wobdźělnika přinošk we wysokosći 1,50 eurow.

## Serbske kemše w Róžeńće zašo

Lětuše putnikowanje kolpingowcow do Róžanta budže přichodnu njedźelu, 29. awgusta. Němsko-rěčna putniska Boža mša budže w 10 hodź. na łuce. Tohodla su serbske kemše přichodnu njedźelu w Róžeńće hižo we 8 hodź.

## Swójbne popołdnjo na Kukowskim hrodzišću

Dekanatne dušepastyrstwo přeprašuje njedźelu, 29. awgusta, na swójbne popołdnjo na Kukowske hrodzišće. Započatk je w 14.30 hodź. z nyšporom, kotryž wobrubja šole z našich wosadow. Přizamknje so swačina. Po tym zhoniće wot fararja Šćěpana Delana a tema dekanatneho dušepastyrstwa zajimawostki wo Alojsu Andrickim. Hry a zaběra za dźěći budu spřihotowane.

## Džělowej městni za młodostnej

Dom swjateho Jana w Smječkecach ma wot 1. septembra městnje za praktikum abo dobrowólne socialne lěto swobodnej. Wobhonić a přizjewić móža so zajimowani pola Tadeja Šimana, nawody domu, telefonowe čisło (03 57 96) 88 61 31.

## **Wulět dekanatneje młodźiny**

Dekanatne dušepastyrstwo přeprašuje młodostnych na lětuši zhromadny wulět njedźelu, 5. septembra. Bus wotjědže w 12.30 hodź. w Radworju pola Šmitec. Wón zastanje w 12.50 hodź. w Baćonju, w 12.55 hodź. w Chrósćicach, w 13.00 hodź. w Pančicach-Kukowje na busowym zastanišću před šulu, w 13.10 hodź. w Njebjelčicach a pojedže do Njedźichowa na nyšpor. Dalši bus wotjědže w 13.00 hodź. z Kulowa do Njedźichowa.

Nimo wjele mocow měli sej wšitcy kupansku drastu kaž tež drastu za mjenje sobu wzać. Kupanska drasta je tež při špatnym wjedrje trěbna. Přizjewić móža so zajimcy hač do póndźele, 30. awgusta, w Don Boskowym domje we Worklecach, telefonowe čisło (03 57 96) 9 55 95, abo na Chróšćanskej farje (03 57 96) 8 04 00. Za wudawki dnja hromadža so wot kóždeho sobujěduceho 15 eurow. Nawrót budže wokoło 19 hodź.

## **Zetkanje samostejacych**

Samostejacy ze serbskich wosadow su na zetkanje štwórtk, 16. septembra, w 14 hodź. do Domu biskopa Bena w Smochćicach přeprašeni. Zajimcy njech so hač do srjedy, 8. septembra, w redakciji Katolskeho Posoła přizjewja, telefonowe čisło (0 35 91) 55 02 12. Štóž chce wotewzaty być, njech to prošu zdźěli.

## **Nyšpor z požohnowanjom konjacych zapřahow**

Towarstwo Cyrila a Metoda, sekcija wěda a skutk, přeprašuje tež lětsa wěriwych ze wšitkich serbskich wosadow na wosebity nyšpor domchowanki. Tutón budže njedźelu, 26. septembra, w 14 hodź. w Chrósćicach na luce při Hatkach (za starownju). Nyšpor wobrubja wosadni dujerjo a chór Meja. Na nim požohnuja so konjace zapřahi.